

興城縣志卷之九

人物上

名宦

鄉賢

孝義

文學

隱逸

耆舊

仙釋

興城縣志

卷九人物目錄

一

興城華昌印刷局印

興城縣志卷之九

人物

無文猶興與凡庸異惟大英雄能造時勢亦有忠烈扶翼綱常乾
坤正氣潛德韜光天生淑貞松筠冰雪彤管不輝眞賞殆絕百世
興起頑廉薄敦行高澤遠是謂聖人述人物

縣境帶海屏山風淳土厚磅礴鬱積閒氣鍾靈嶽降甫申風希夷惠孝
稱人瑞忠爲國楨至巾幗之賢或居窮課子荼蘼同欽或之死靡他冰
霜比潔他如龔黃政績元白才華惇史昭垂遺編尙在旣歌功而頌德
亦摘豔而薰香因思代間熙攘只爭位高多金而不朽之圖轉在於富
厚功名之外鄒東郭有言問邑之貴則數高位者以對問邑之富則數
積財者以對問邑之人物則數修德勵行濟世範俗者以對而富與貴
不齒焉然則士生今日欲求有所表見不至隨庸衆芸芸以生泯泯以
死宜何道之從焉

名宦

後漢

趙苞字威豪甘陵東武城人舉孝廉爲遼西太守抗厲威嚴名振邊俗遣使迎母及妻子道經柳城值鮮卑入塞劫其母以擊郡苞督兵禦之賊出母示苞苞號謂母曰爲子無狀本欲以微祿養不圖爲母作禍今不得顧私恩毀忠節母遙謂曰人各有命何得相顧以虧忠義卽進戰賊悉摧破母妻皆爲所害事平封苞爲郇侯苞歸葬訖謂鄉人曰食祿而避難非忠也殺母以全義非孝也如是何面目立於天下遂歐血而死

按伊川程氏謂苞以君城降賊而求生其母固不可矣然亦當求所

以生母之方奈何不顧而遽戰乎必不得已身往降之可也徐庶於此蓋得之矣（綱鑑易知錄）然則苞之歐血而死其情固可矜其忠固可嘉倘能權衡之於義理則更善矣

三國魏

牽招字子經安平觀津人曹操將擊袁譚而柳城烏桓欲出騎助譚操以招嘗領烏桓遣詣柳城說令罷兵後從討烏桓至柳城拜護烏桓校尉文帝立拜招使持節護鮮卑校尉廣布恩信招懷降附至十餘萬落

隋

李景字道興天水休官人大業七年從征高麗爲將攻武厲城破之九年復出遼東師旋追兵大至景擊走之進爵滑國公十二年煬帝令景

營遼東戰具于北平粟帛山積景無所私江都之變盜賊蜂起遼西太守鄧暲救景遂歸柳城將還幽州遇賊見害契丹靺鞨素感其恩聞之莫不流涕

度地稽粟末人本白山渠帥煬帝時窘于高麗因率所部降拜右光祿大夫居之柳城及遼東之役從戰有功十三年從幸江都尋放還柳城爲李密所邀前後十餘戰僅得免（謹按度地稽唐書作突地稽）

唐

全客努懷州武涉人開元中室韋首領段普洛數苦邊節度使薛楚玉使客努單騎襲之斬其首以歸拜左騎尉將軍數戰有功安祿山反平盧節度副使呂知誨降賊害安東副都護馬靈察客努與諸將殺知誨遣使與安東將王元志相聞天寶十五載以客努爲柳城郡太守賜名正臣以元志爲安東副大都護正臣遣使道海至平原與太守顏真卿相結且請出師未至而平原失乃還

元

懷閭公西域鄂勒歡人太祖時爲瑞州達嚕噶齊民感其惠立德政碑

按元太祖時置達嚕噶齊監治郡縣瑞州即今寧遠州○鄂勒歡滿洲語乾也原作阿魯渾達嚕噶齊蒙古語首領也原作達魯花赤今俱譯改

明

曹鳳南直隸臨淮人洪武時以功調廣寧中屯衛指揮同知始築城池開創衛治撫恤士卒仕至都指揮同知

劉斌南直隸崇明人永樂初以靖難功授指揮使進都指揮僉事備禦

甯遠築城建衛時值歲儉外禦邊陲內撫軍士政理民安甚有能聲
王祥河南固始人宣德時以都指揮僉事任廣寧開府僉事修築寧遠
蒲河等城掌遼東事恤下興學頗多善政

巫凱南直隸句容人幼穎異七歲賦牡丹詩十九歲代父百戶職宣德
初以都督僉事充總兵官鎮守遼東敵掠西山凱擊敗之盡得所掠者
降勅褒勉時朝廷勤遠略造舟松花江招諸部地絕遠轉輸大困凱力
請罷之已而造舟役復興中官阮堯民都指揮劉清等董之所爲多不
法凱劾堯民等下之吏凱性剛毅饒智略馭衆嚴而有恩在遼三十餘
年威惠並行邊務修飭前後守遼者皆莫及正統三年卒於官

王翱直隸鹽山人正統七年以右僉都御史提督遼東軍務時遼東將

興

城

縣

志

卷九人物

五

興城華昌印刷局印

屢失機翱以軍令久弛因諸將庭謁責以失律罪命左右曳出斬之皆
惶恐叩頭願效死贖翱乃躬行邊自山海關抵開原繕城垣浚溝塹五
里爲堡十里爲屯使烽燧相接練將士恤鰥寡軍民大悅又以邊塞孤
遠軍餉匱乏緣俗立法令有罪得收贖人皆便之

文廣南直隸江都人正統時以署都指揮僉事備禦甯遠諾延犯邊廣
率兵窮追遇伏中流失死贈鎮國將軍

李榮南直隸江都人正統時守備塔山追敵至利州大戰長坡自午至
暮不少挫敵棄所掠遁邊境以安學士仇謙爲賦塔山李將軍歌

范廣遼陽人正統中嗣世職爲甯遠衛指揮僉事積功進遼東都指揮
僉事廣性剛果精騎射驍勇絕倫每臨戰身先士卒英宗北狩廷議舉

將材于謙薦廣充左副總兵額森犯京師廣躍馬陷陣敗之又敗之於紫荆關錄功進都督同知景泰初以總兵官巡邊駐居庸還京副石亨提督團營軍馬亨素銜之英宗復辟誣廣黨于謙下獄死成化初廷臣訟其冤命子昇仍襲世職（額森原作也先今譯改）

耿賢定遼前衛人由指揮陞都指揮僉事掌都司印備禦金復鐵嶺尋守備甯遠轉右參將分守開原善撫士卒不妄交際致仕歸所屬憫其清苦各餽金幣賢悉分之軍士後卒葬城東杏林山與其師顧能墓相近詩人弔之以爲師弟雙清云

李英其先盧龍人遷義州成化中爲廣甯中屯衛指揮歷左軍都督僉事充右參將分守錦義二城講武恤士訓練之暇以書史自娛敦尙古

禮建祠宇謹祭祀一以朱子爲法在任七年百度具舉

王銘錦州人成化中守備甯遠講武練軍重修二城廟學甲辰有寇警銘率精騎捲甲直趨百餘里遏其歸路盡獲所失人畜而還自是數年無犯境者

曾銑南直隸江都人嘉靖十四年擢巡按遼東時都御史呂經苛急爲政軍士遂叛銑按部至復州聞變卽還入城開諭禍福以安之是月丙申廣甯撫順兵變銑各檄示撫安密受諸將以計謀擒渠魁七月甲子銑行射禮文武畢至忽出袖中姓名分令官卒捕之逾時縛八人至明日擒撫順爲變者七人計殺廣甯賊首擒十二人不假兵革三城肅清遼人廟祀之

按曾銑於明嘉靖二十五年四月以兵部侍郎總督陝西三邊軍務是冬俺答以十萬騎入掠延安慶陽銑率兵數千駐塞門而遣前參將李珍搗巢於馬梁山後敵始退嗣因嚴嵩爲仇鸞復仇誣奏夏言納銑金法司坐銑交結近侍律斬西市妻子流二千里此在專制時代強臣當國生殺予奪本無公理之可言雖由君主庸闇使然亦可見專制之不能久存早爲天演淘汰之定理矣

李松直隸大城人嘉靖進士官至甯前道威惠並施歷十二年晉秩至右都御史撫遼三年軍民悅戴

熊廷弼湖廣江夏人神宗三十六年巡按遼東杜饋遺核軍實時巡撫趙楫等棄寬甸新疆徙編民六萬家於內地廷弼勘得棄地驅民狀劾

興

城

縣

志

卷九人物

七

興城華昌印刷局印

二人罪歲大旱廷弼行部金州禱城隍神約七日雨不雨毀其廟及廣甯踰三日大書白牌封劍使使往殺之未至風雷大起雨如注遼人以爲至誠感神天啓時爲御史馮三元等劾罷去任遼士民莫不垂泣後以廣甯失守論誅清乾隆四十八年特奉旨錄其裔孫泗先授教諭

袁崇煥廣東東莞人天啓二年駐守關內安置遼人之失業者常夜行荆棘虎豹中時十三由難民十餘萬久困不得出崇煥將五千兵駐甯遠以壯聲援別遣驍將救之三年督修寧遠城工成爲關外重鎮崇煥在職勤慎善撫將士由是流移駢集商旅輻輳遠近望爲樂土清乾隆四十八年奉旨錄其裔孫袁炳授縣丞

金冠里貫未詳官參將天啓六年清兵略覺華島冠死之乾隆四十一

年賜諡節愍

金啓侗浙江義烏人起小吏勤敏有志略天啓六年清兵攻甯遠啓侗以燃礮死乾隆四十一年賜諡節愍

何可綱遼東人天啓中爲守備典袁崇煥寧遠道中軍廉勇善撫士卒以功累遷署寧遠副將事崇禎元年崇煥再出鎮仍以可綱爲中軍請令可綱專防甯遠且言可綱仁而有勇不破公錢不納私餽敝衣糲食不異士卒事至善謀其才不在臣下臣向所建樹實可綱力詔加都督僉事進右都督三年永平灤州失守可綱連戰有功尋復永平加太子太保已而錦州被圍督諸將赴救與祖大壽監築城大凌河工甫竣清兵十萬攻之可綱堅守不下糧絕援盡大壽及諸將皆欲降獨可綱不

興

城

縣

志

卷九人物

八

興城華昌印刷局印

從大壽令二人掖出城外殺之可綱顏色不變亦不出一言含笑而死乾隆四十一年賜諡忠節

祖寬遼東人少從軍有功累官甯遠參將勇敢善戰部卒多塞外降人所向克捷崇禎五年叛將李九成圍萊州詔發關外兵討之寬爲前鋒率五百騎遇賊兵三千於沙河寬殊死戰賊退走解萊州圍進都督僉事八年爲總兵官討流賊挫張猷忠於焦村復遇汝州賊寬率軍至大敗之十一年清師下山東濟南失守時誣寬以失陷藩封被逮棄市寬敢戰有功稱良將性剛使氣不爲文吏所喜卒罹大辟莫爲救論人頗謂失刑云

金國鳳宣府人素懷忠勇有捍禦才明崇禎間以副總兵守松山十二

年二月清以重兵來攻環城發礮台堞俱摧城中人負靡以行國鳳間出兵突擊輒敗還乃以木石甃補城壞處清兵屢登屢却遂分兵攻塔山連山令銳卒分道穴城國鳳多方拒守終不下閱四旬圍解帝大喜立擢署都督僉事爲甯遠團練總兵官再論功署都督同知蔭錦衣衛千戶是年十月清兵復攻甯遠國鳳憤將士恇怯率親丁數十人出據北山岡鏖戰移時失盡力竭與二子俱死帝聞痛悼贈特進榮祿大夫左都督賜祭葬有司建祠（明史本傳）清乾隆四十一年賜諡忠烈邱民仰陝西渭南人始爲縣令有治政後擢巡撫遼東崇禎十四年清兵圍祖大壽于錦州民仰轉餉甯遠偕洪承疇進至松山爲聲援八月五將皆潰清兵遂進圍松山民仰誓以死守十五年二月圍急援絕城破被執民仰死之乾隆四十一年賜諡忠節（以上見盛京通志）

清

楊道隆正藍旗人廕生康熙三年任州事除暴安良四境不擾政簡刑清遐邇傳頌

吳秉禮福建福安縣人拔貢雍正十一年任州事興利除弊尤以清廉自牧

伊湯安滿洲人字耐園乾隆年任州事創修州治城垣建柳城書院置學田延山長士林愛戴邑之文風由此大啓後升浙江杭州府知府去任

劉大觀里貫未詳字松嵐進士嘉慶十年任州事聽斷如神無伏不發

既而訟庭草長與民無事振興書院開課衡文得士如劉登泰潘紱麟吳景春朱孔揚唱學誠王元濤姚夢瀾諸人皆文名冠一時州署西偏有隙地構退思草堂三楹爲公餘讀書之所曾製一聯云袍笏呼來先拜石管絃揮去獨聽松頗膾炙人口移官至山西河東道去官後隱於王屋山著有玉磬山房詩文集

强上林江蘇溧陽人字杏齋由庶吉士於道光二十七年任州事務以德化惠及于民催科不是敲朴而輸納恐後感民之心可見重修城垣不勞于民捐廉購書藏諸學宮以貺寒畯時州治西南烟台河北岸風沙壓田公親臨履勘勸民治河植樹而沙壓之患遂除至今猶利賴之張鼎庸江蘇人字芷生舉人咸豐八年任州事其時盜賊蜂起州城戒嚴公到任治之如法四境肅然民賴以安（以上見甯遠鄉土志）

興

城

縣

志

卷九人物

十

興城華昌印刷局印

朱克揚字北垣浙江蕭山縣人監生在任時待民恩厚刑法極寬曾出其宦囊所蓄銀一千六百餘兩按六緡約合東錢一萬緡發商生息留與柳城書院培士優其膏火厥後交卸並未携去又隔數年經伊孫將欸提出向來有司下鄉驗屍場費大村須東錢千餘緡至少亦數百緡克揚下鄉所乘敝車羸馬祇帶長隨一人字書件作各一人一切規費絲毫不取人欽其廉先是馬州刺宗武在任因署中人購炭福源店過秤例不去皮因與該店夥計口角遂將執事嚴押該號財東武生徐殿魁率姪武生徐洵徐瀛等來署見門房理論值馬州刺下鄉驗屍又與門房役人衝突氣忿自搥堂鼓役人遂自將堂事棹推翻帷幕損壞誣

賴殿魁等所爲馬州刺不察行文省署擬以闕堂塞署之罪未及執行去官克揚到任廉知其屈又不便結同寅惡感故將殿魁武生斥革並定罪徙刑三年發往遼陽其武生後亦開復至今土民德之

談廣慶字雲浦先世駐防廣州隸鑲白旗漢軍籍以繙譯進士改知縣揀發奉天其在任時值歲饑饉紳士公請定價或斷運廣慶謂定價小糧益外運若大何定爲不如使商家赴他處購糧官與紳商咸集股官任其鉅紳商任其細來糧出售不計利寧賠少許議定使和生厚鴻發源商人赴大城子購買紅糧辦平糶不但足食而且及新秋仍餘糧數十石廣慶諭衆商攤收商家以官忠厚互相推諉廣慶留爲己用以飼馬至朽蠹焉厥後其子國楫國桓同登科第接武宦奉廉能有父風人咸謂廣慶居官清介所致云

興

城

縣

志

卷九人物

十一

興城華昌印刷局印

趙臣翼字燕孫江蘇丹徒人進士於光緒二十四年任州事甫下車整頓柳城書院不遺餘力每逢官課躬自衡文評定甲乙優其膏火尋奉省令以柳城書院故址創建集寧學堂延閔次元爲英文教習學正李崇瑞爲漢文教習招生二十餘人究研科學此爲嚆矢二十六年拳壇召釁俄兵入城闔城人民驚恐惟臣翼義重守土不忍舍去嗣以供給得當俄人漸就範圍賴此鎮靜商民安堵本年十二月間有關裡徒匪盜販洋鎗子彈乘火車東行至本城車站被洋兵查出擊斃二名遂疑城中藏匿奸宄知會駐山海關俄兵統領二十九日突來馬隊千餘名臣翼聞信馳赴車站力辯其誣始而言語齟齬既而拚命力爭遂被俄

人羈留於車站暗室監視經宵臣翼作絕命詩以見志後因本地紳商聯名力保乃免其不畏疆禦視死如歸有如此者旋去官後官至奉天東邊道

民國

程銘善字復初安徽合肥縣人由舉人大挑知縣蒙段芝貴上將軍奏調來奉於民國四年任州事實心任事公正廉明見義勇爲不避勞怨跡其在任善政更僕難數且文理優長如自擬四六公啓募修聖廟復有志創修縣志均以籌款爲艱無人擔任不果行今其文膾炙人口復自擬四六公啓募修城垣數十餘丈具呈省憲會同鐵路工程司修築北河佟家屯等壩以紓水患全活人民無算而民間所擔負欸項究屬

無幾事詳東北關公民所立德政碑文中辦理居民與日本人交涉案件共二一爲南街李洛殿市房租與楊洛玉日本人大韋串六明石開葺等間接強佔與李洛殿口角歐傷李洛殿工人陸美一案一爲錦縣五里營村莊頭張立之有伍田地若干日坐落縣屬白馬石蔣家寺等屯地係多年長租老佃增租變產一切不得自由嗣經張立之指地借日本人中村佳一票洋若干元因欸不能償中村佳一遂親至該屯等處欲實行履地管業衆佃戶赴縣呈控一案其代表中村佳一涉訟者即本板好長亦日本人前案經銘善以李洛殿並非直接租與日本人其租約不能發生效力理由具詳省憲蒙遼瀋道尹榮厚派前署州刺劉培荃查覆結案將日本人驅逐出境後案經銘善將莊頭張立之暨

衆佃戶傳案訊究限期令佃戶出貲還日本人債而出款無多即將其土地所有權讓渡於衆佃戶至今該屯等居民感恩刻骨興城從此永無殖民之患後以口音不同去官邑人追懷其德咸尸祝之

恩麟字錫三奉天法庫縣人清之宗室熟於刑律之學歷任奉天典獄廉惠有聲以勞績擢署熱河開魯轉任興城知事下車伊始查知釣魚台係公共海口爲邑紳串通私領冀圖壟斷罔利乃毅然追銷私領之大照仍歸公有立解紛糾商民爲之立碑頌德餘如整頓警察維持治安擴充學校宏展教育安設城鄉電話以靈通消息創設屠宰場所以慎重衛生海雲寺爲廟產訴訟十有餘年立即解決縣公署之房屋失修勢將傾圮募款修補辦理民刑各事案件必出親裁一秉大公從不

受人請託聽訟不事威嚇而咸得其情跡其創修縣志以端風化重修孔廟以興文運獎勵植樹以厚民生倡導養蠶以興地利設村長講習會則躬爲之師立圖書閱報社則民牖其智叛兵城內變亂處以鎮靜而秩序賴以不紊民間食糧缺乏嚴禁外運而民食得以維持在任三載兩經直奉戰事歷受蠻野威嚇備嘗顛險卒以人民愛戴之故克免於難逆軍敗後潰兵數千人乘汜車由京奉鐵路西竄屯集車站有逆軍團長要求開城歇兵乃急下令閉城四門屯以土囊堅執不許竟賴其力保全甚衆至今民思慕之目覩警察廢弛撤換所長者再方欲大加整頓遽升任瀋陽縣以去其他禮賢下士知人善任流風善政不勝

鄉賢

唐

李楷洛營州柳城人本契丹渠帥中宗時累官左羽林大將軍封薊郡公吐蕃寇河源楷洛擊走之初行謂人曰賊平吾不歸矣師還卒於道諡忠烈

李惠登營州柳城人爲平盧軍裨將安祿山叛從董秦泛海略定滄棣等州輕兵遠鬪賊不支戰輒壯史思明叛惠登陷賊中以計得脫依來瑱及李希烈反以兵二千使屯隋州惠登挈州歸朝即拜隋州刺史居二十年興利去害田闢戶增人歌舞之節度使于頔上其績詔加御史大夫

李光弼營州柳城人楷洛子襲父封以防破吐蕃吐谷渾進雲麾將軍安祿山叛郭子儀薦其能詔加魏郡太守河北採訪使光弼以朔方兵五千東救常山降賊將安思義又却賊於饒陽郭子儀守雲中詔悉衆出井陘與光弼合擊史思明於九門西大敗之及拔趙郡士多擄掠光弼坐譙門收所獲還之民至德二載思明等將兵十萬攻光弼於太原時麾下兵不滿萬光弼徹屋爲柵石車石所擊輒傷賊思明爲飛樓障以木幔築土山臨城光弼遣人穴地頽之又時遣突騎出乘賊俘斬萬計思明乃遁去乾元初九節度師潰於相州光弼整衆還太原未幾爲天下兵馬副元帥賊方闕洛光弼悉軍趨河陽擒安太清於懷州廣德元年擒浙東賊袁晁賜鐵券圖形凌烟閣光弼知兵善用人謀定後戰

能以少覆衆初與郭子儀齊名而戰功推中興第一卒贈太保諡武穆李彙光弼子有志操廉潔自矢元和初徐州苻離分爲宿州以光弼有遺愛擢彙爲刺史後遷涇原節度使罷軍中雜徭出俸錢贖將士質賣子還其家卒贈工部尙書

金

持嘉暉字仲明先居遼後家萊州體貌雄偉慷慨有志略太祖天輔六年從棟摩定興中府義錦等州破張覺及再伐宋功皆最留撫河間時居民被掠老幼存者無幾暉下令軍中聽贖還之及攻降濟州暉約束軍士秋毫無犯連敗宋軍遂至餘杭及還載資治通鑑板以歸累功遷歸德軍節度使宗州（即唐萊州在今寧遠州境）舊無學暉爲營建學

舍勸督生徒肄業者復其身人競趨之屬縣民家奴王夔者嘗業進士暉以錢五十萬贖之使卒其業夔後至顯官天德中封暉河南郡王拜平章政事卒諡武（持嘉八旗姓原作赤蓋今譯改）

按西哲謂國家用人苟能功食相準去其所傳則其國無不强其羣無不進者昔諸葛忠武嘗謂諸有忠慮於國者當勤攻吾之缺是以得崔州平法孝直諸人之助毆陽文忠好士士有一言之合於道不憚數千里求之甚至過於士之求公呂文穆爲相夾袋中有冊子謁見者必問人材客去即疏奏之故用人稱職歷觀古今來史冊所載凡爲國家樹根本縣遠之計者無不以汲引人材爲首務興城自民國以來其當路而操進退人材之枋暨具有推薦資格之强有力者

不得謂絕無其人而拔茅連茹顯揚側陋至今無所表見豈十室之邑渺無忠信耶抑憂先天下雖有其人而未遑舉耶盖嘗紬繹其故而不可得噫殆所謂賢者固難測也

元

姚樞字公茂本柳城人後遷居洛陽世祖至元二十年爲遼東按察使武平縣民劉謐訟其嫂與所私同殺其兄成縣尹丁欽以成屍無傷憂懣不食妻韓問之欽語其故妻曰恐頂顙有釘塗其迹耳驗之果然獄士上讞公召欽詢之欽矜妻之能具以告公曰若妻處子耶曰再醮令有司開其前夫棺毒與成類併正其辜時人比之包孝肅云

明

畢恭廣甯前屯衛人其先山東濟寧籍恭有文武才正統間以巡撫王翱薦授百戶歷指揮僉事圖上方略開設迤西邊堡墻壕增置烽堠兵威大振進署都指揮僉事守備寧前等衛在任五年邊鄙寧謐進掌都司撫士卒革姦弊廣屯田興學校政事平理軍民咸稱之所著有邊城吟稿

陳壽字本仁其先新淦人祖志弘代兄戍遼東遂籍寧遠衛壽少貧甚得遺金坐至夜分還其主從鄉人賀欽學登成化八年進士授戶科給事中言時政無隱彈劾不避權貴弘治十三年以右僉都御史巡撫延綏敵兵入掠擊却之未幾和碩托囉率衆大至壽自出帳擁數十騎據烏皮几指揮敵疑之遂引去旣而授諸路將領方略邀擊之皆克捷軍

聲大振尋遷右副都御史掌南院正德初劉瑾矯詔逮南京科道戴銑等壽抗章論救瑾怒罷其官九年復起巡撫陝西盜賊屏息廉名尤著夏大旱戒刑清獄齋心誠禱天乃雨歲大熟尋拜南京兵部侍郎陝人呼號擁輿移日不得行進刑部尙書致仕卒年八十三壽清廉歷官四十年無家可歸寓南都所居不蔽風雨其卒也尙書李充嗣府尹寇天叙爲之殮（和碩國語方隅也托囉國語桃也）

楊照字明遠前屯衛人都督鎮之孫嗣世職爲前屯衛指揮使嘉靖中以功累遷遼東總兵官屢立戰功嚴嵩怒照不輸賄解職嵩敗朝廷以宿望起之四十二年蒙古深入金海諸衛總兵官吳瑛不能禦詔罷瑛以照代其秋又聚衆廣寧塞外謀大入照率諸將由鎮夷堡分道掩之以夜失道去塞六十里遂爲敵所困力戰中矢死照忠勇負氣撫士有恩嘗涅盡忠報國四字於背誓以死自效起官數月間屢戰皆捷竟殞於陣贈少保左都督諡忠壯

楊維藩照叔父結髮從父在行間屢效首功積官指揮僉事擢廣寧鎮武營遊擊痛照陣亡誓滅敵雪恥嘉靖四十四年蒙古萬餘騎攻鎮武維藩兵不滿千迎之於境內蓮子湖台與衆誓曰此死地也血戰或生遂進戰殺敵幾半手刃數十人力竭死之詔贈都督僉事與線補袞並立祠祭祀子襲職贈三秩

線補袞寧遠衛人世職衛指揮歷官進寧遠參將嘉靖四十四年敵攻小團山補袞擊却之追至黃土台敵大至圍之數重補袞與遊擊楊維

藩塵戰良久補袞手殺數人面中二矢鏃出腦後突圍還營數日而殞
詔贈都督僉事（以上見盛京通志）

李如松甯遠人父成梁萬歷間張居政當國推選名將是時成梁與戚繼光齊名而武功較戚爲多故得封世襲伯五子俱膺節鉞其長子如松智勇傑出萬歷間寧夏哮拜父子合劉東陽時倡亂命如松討之如松先登入城功第一會日本攻陷朝鮮宋應昌舉如松爲征東提督奮勇先登倭軍驚動半載之間連平大寇威名甚著後追敵陷伏中死之贈少保襲寧遠伯諡忠烈（甯遠鄉土志）

祖承訓字偉績祖仁次子少有大志不是咕嗶好習弓矢嘗謂人曰人之功名何必讀書然後得乎能馳馬試劍爲國家折衝禦侮亦不在筆

墨之下日習技成銳然往廣寧提督李成梁軍門請見即置部下後征倭多立首功神宗時由百千累官至遼陽副總兵加左軍都督橫玉帶又立功授甯遠衛指揮同知協守遼陽時嘗一日而禦九門之敵兵備道栗公佚其名登城觀戰躑足嘆曰若斯驍勇書生能不爲之執鞭有此一將國家之福不爲申報論功監軍者無本心矣奏凱往廣甯與成梁備述是事成梁恐已無色私謂承訓曰祖副將欲奪提督印乎承訓曰何敢成梁曰堵禦九門將報貴協獨力乎抑報我合力乎承訓曰是斷在上台成梁曰稍存我體可也後竟不報全功承訓臨陣勇氣莫敵中外名爲鷓鷹（祖氏家譜）

王廷臣邑西南沙河所人官遼東都督同知明崇禎十三年代劉肇基

爲遼東總兵十四年八月戰於錦州諸將連敗廷臣與洪承疇退守松山十五年二月城破承疇降廷臣被執不屈死之清乾隆四十一年賜諡忠節（錦縣略志）

李輔明遼東人累官副總兵崇禎初從祖寬南伐連破流賊於嵩縣海州確山明年追破流賊於滁州加都督僉事擢山西總兵官被劾罷洪承疇出關使從征旣而楊國柱戰歿遂代爲援遼總兵十六年冬清兵薄寧遠輔明馳援力戰歿於陣乾隆四十一年賜諡烈愍

楊倫前屯衛副總兵以拒守陣亡又前屯衛總兵李鳳鳴前屯衛副總兵羅文耀寧遠總兵王定宸俱遼東人皆櫻城拒守城破死之清乾隆四十一年賜楊倫諡烈愍李鳳鳴羅文耀王定宸俱諡節愍

清

張尙寧遠州人隸正黃旗漢軍清太祖定遼來歸崇德三年任戶部啓心郎以稱職列優叙順治十二年擢福建右布政使時海氛甚熾陷漳州泉豐以南震動大軍進勦資糧供頓日費數十萬錢尙督餉無匱監造巨礮攻具往來海上親冒矢石備歷險阻卒復漳州遷左僉都御史巡撫甘肅卒于官閩人思之祀名宦祠

線國安遼東人隸正紅旗漢軍崇德元年隨孔有德航海歸誠從征海外各島及克服朝鮮皆在事有功順治元年隨大軍入關追勦流賊李自成於潼關破金溝寨復從征江南克揚州以兵先渡揚子江克江陰四年隨征湖南取衡山六年授總兵官復隨攻湖南多所擒獲招安反

側官兵六七萬人隨進取廣西之桂林柳州功最遂鎮南甯七年李定國犯桂林提師赴援定國遁去九年授提督十年李定國擁衆數萬復犯桂林國安與陳維新計敗之遂平定全粵十一年復永寧州叙功加太子少保征蠻將軍順治十二年叙恢復桂林功授三等伯世襲十五年隨進取滇黔戰李定國於涼水井殺賊五十有餘復戰於水寨山口殺賊萬計十八年授都統康熙五年因老乞休十四年卒國安性廉介二十餘年清操如一人咸以爲難

張朝璘隸正藍旗漢軍父士彥明廣寧守備爲巡撫王化貞中軍化貞遁入關士彥來降授三等輕車都尉朝璘襲職崇德七年以佐領從攻登州八年從克中後所前屯衛二城晉世職爲二等任兵部理事官順

治二年從豫親王多鐸下江南攻克揚州城駐防蘇州擊敗明總兵黃蜚等軍蜚復擁千艘來犯朝璘以舟師迎戰春申浦大敗之四年從恭順王孔有德征明桂王朱由榔於武岡乘夜疾進遇明將曹志建軍擲火毬焚其營志建軍潰復敗僞國公劉承允於夕陽橋承允乃以武岡降由榔走靖州朝璘轉戰黔陽破僞伯張光璧所部五營進克沅州六年從睿親王多爾袞討叛鎮姜瓖於大同復渾源左衛及朔州汾州太原等城歷官副都統晉爵至一等男累遷戶部侍郎尋奉命巡撫江西時南昌瑞州二府經金聲桓之亂戶口凋耗田多荒落巡按御史笄重光請蠲賦興甿下朝璘議具言二府荒田六十餘萬畝自召墾以來新甿雲集成熟者四十萬未墾者尙二十餘萬若一槩徵科必將以荒田

之賦飛寄熟田新甿若賦重勢且委之他徙則不特荒者終荒漸至熟者亦荒應如重光言蠲之便得旨報可十四年加兵部尙書十八年擢江西總督康熙二年右布政使王庭請減南昌府屬賦額復下朝璘議朝璘博考江西諸府縣志知南昌袁瑞三府橫征之弊自陳友諒始友諒以武甯乃其鄉縣故縣賦獨如宋元舊額而他皆倍之明沿其弊末革前撫臣蔡士英按臣吳贊元欲革其弊而是時府縣新定舊志散亡僅據右布政使莊應會所得故牘奏減袁瑞二府賦額未及南昌今庭請減之誠恤民至計疏入遂減六縣一州歲徵銀十九萬五千餘兩米十四萬九千餘石民甚德之四年裁江西總督乃還京五年復出爲福建總督六年以老疾致仕越十餘年卒子聖鐸襲職

張朝珍廣甯人隸正藍旂漢軍初任工部啓心郎順治十八年巡撫安徽凡所陳奏皆切中利弊康熙十二年任湖北巡撫時大軍進勦滇黔軍務旁午朝珍不遑寢食造戰船以練水師建浮橋以渡兵馬運糧抵蜀不派民夫歲饑捐賑全活甚衆在楚數年招流亡安舊業絕饋遺禁火耗政有實惠嗣以勞瘁卒於官祀湖廣名宦

張朝瑞廣寧人隸正藍旂漢軍順治五年知河南登封今年少英毅洞悉民隱邑經兵燹土曠民稀招徠流亡多方勸墾凋殘頓蘇以循能擢御史巡按湖北瀕行父老追送百餘里蒞楚後清節益著屬吏皆敬憚之

穆爾謨甯遠人順治初知江南贛榆縣精明強毅聽斷如流案無積塵

時士寇猖獗爾謨親帥鄉民勦捕斬其渠首賊遠遁不敢復犯縣境以安（以上見盛京通志）

祖建衡世居城內清世祖丙戌年歲貢生任山東兗州府金鄉縣知縣歷任福建按察司廣西布政司卒於官欽賜御祭康熙年間入祀福建名宦祠（祖氏家譜）

柏天儲世居城北柏家墳村清順治時由侍衛充佐領於十八年出征永利在湖南陣亡贈一拖沙喇哈番入祀忠臣廟（柏氏家譜）

劉登泰字仙一邑西南新民屯人清歲貢生文學品詣超邁一時咸豐初年部選直隸無極縣學官抵任年餘值髮逆北竄擾無極守土者有潛意登泰昌言曰讀書數十年當知城存與存城亡與亡甯死勿去之

義次子中義隨侍在署亦不忍去後賊陷隣封而無極無恙尋解組歸田猶如布衣後進者皆以登泰爲矜式

朱光宇字錦橋原名鳳儀邑西南沙河所人清道光己酉拔貢生以州判分發河南歷知各州縣事循聲卓著其官禹州時也值髮逆北竄禹境適當其衝光宇興辦團練督剿擊賊大獲勝仗著有禹州用兵紀略藏於家其治汝陽也捐廉一千二百金創設孤貧院光字母張復措貲六白金爲助凡汝之無告窮民得不流離失所咸豐十一年宰祥符時有寇突至城下光宇整隊出勦上峯阻止越日賊遂西竄難民麇集城下光宇以蒸餅糲下與之食全活無算同治元年春團練大臣毛河督黃豫撫鄭文章以河南第一賢員薦奉上諭毛咏熙黃贊湯鄭元善等

奏特舉賢員一摺河南祥符縣知縣朱光宇才守兼優膽識並壯勇能禦寇惠足孚民洵爲河南第一賢員著依議欽此遂由祥符令擢開封守加道銜二年春因母老乞養歸里是時也關東盜匪猖獗四年欽差大臣尙書文祥將軍福興督師東征奏派光宇與在籍紳士同知李鵬揚辦理甯屬團練五年春丁內艱河南巡撫李鶴年奏調光宇辦理汴省軍務七年秋安陽民聚衆抗糧大府檄公往剿光宇曰剿不如撫民苦糧而官之督民者必曰速完糧民苦差而官之令民者必曰速辦差是驅民速之亂也遂携二三僕往河北撫輯百姓欣相告曰我朱公來凡我百姓敢不唯命是聽不費一兵而事戢凡遇大災捍大患大府咸倚重之同治九年八月擢開歸陳許道未到任而卒

劉汝敬字慎齋清恩貢生邑西北黑莊科人同治元年舉孝廉方正敦品勵行尤長制藝講學里門人爭就傅家夙豐好施與設粥廠乞食者接踵至歲以爲常光緒九年選授直隸南皮縣學官之任時囑家人曰博施濟衆是讀書人應盡事須體我心好爲之每寄家書猶殷殷以鄰里之疾苦爲問卒於官

楊光第字錦堂城西南沙河所人清同治辛未武進士光緒四年以藍翎侍衛特授直隸通永鎮通協采育營都司甫下車時營兵半吸鴉烟又兼餉素棚扣服率襤褸債家每倚貲呵叱光第慨出金代償並出葭數斤佐戒烟服敝者易之營政遂肅六年采市陳姓與鄰縣伊指揮營村（俗名回子營）伊姓口角械鬥經毛巡檢賡虞傳訊杖責且嚴押伊

姓回衆憤甚翌日聚衆數百咸身畫白記持械來鎮意欲威嚇劫伊姓出汎官周義和率兵彈壓突被回衆刀傷營弁以情同叛逆咸請勦冀功賞光第弗聽且盡力爲之解脫得免重坐該村故多盜自是咸感泣相戒不入境九年歲大饑文欽使恰奉旨設粥廠時饑民過衆賴光第盡力彈壓始無擁擠傷人情事後蒙李直督鴻章准予記大功二次十六年復大饑胡欽使聘之率員設廠時飢寒比曩尤衆擁擠亦甚於前光第到廠必諭以婦女外出情非得已各宜安分勿貽人非笑胡公爲是派光第襄辦賑務斟酌使無遺憾自是星出晡返積勞過甚廠未蕙事即得衄血症幾殆差竣胡公升京兆尹蒙奏獎以遊擊升用先換頂戴翌年楊通水道宗濂與桂道本誠董修鳳河皆躬至營署訪利弊鎮

南舊有大石橋年久失修行旅艱之士人議修屢以欸絀不果光第爲謁楊道宗濂大興謝令裕楷籌畫得七百餘金又爲婉商隣邑鉅富何星岩得灰磚石足用工賴以竣十八年歲又饑謝令因設廠半在所治苦支費擬將采局移置于馬駒橋賴光第面謁岑欽使春煊局得復設采人咸慶再生全活無算二十六年夏間拳壇肇隙聯軍入都兩宮西巡民心惶駭兼之餉源已絕光第惟以忠義勵其部下藉免星散遲至閏八月二十九日突有德兵入境闔鎮官吏皆遁惟光第以不忍斯民之故衣冠堂上爲民乞命時光第長子附生蔭芬與署馬駒汎把總張進忠在側詎要素無算光第抗論不屈德兵怒擁光第父子等至鎮東馬神廟見其軍官軍官似有所詰責光第聲色俱厲憤不欲生德兵出

鏡照像訖遂傳哨轟擊蔭芬身中四鎗瀕死復甦光第遂與張進忠同時遇害嗣經崑欽使崗奏請卹典奉旨著照遊擊例賜卹又經李直督鴻章奏請卹典奉旨仍照遊擊例賜卹並入祀本籍昭忠祠民國十三年七月經光第次子蔭芳呈請縣公署援例入祀鄉賢祠蒙批該紳故父楊光第在任盡忠報國應准入祀鄉賢祠以資觀感遂於九月初三日備具載主乘輿牌繳儀仗咸備一時公署重要人物暨各機關領袖咸衣冠濟濟恭送入祠云計光第在任二十三年囊無餘資每歲廉俸所入除竭力供其二子延師課讀外餘盡以之分潤宗族伙助友朋生平嘗舉范文正公就祖宗上論均是一樣子孫子孫有發籍者不當獨享富貴薄待宗族等語勗其二子雖自奉儉約而在任供其堂侄春育絕尠其篤於宗族蓋天性也

按此稿因纂修避席由協修趙述代纂理合聲明

孝義

宮守禮寧遠衛人生員性端謹好古守禮父思問病衣不解帶藥必親嘗及卒廬墓三年有白雀來巢於廬上事繼母尤謹朝夕率妻拜問繼母初欲改適感其孝遂止與鄉人飲守禮在坐少長莫敢喧嘩其風動流俗如此嘉靖間守臣上其事詔旌其門

朱國正

按盛京通志所載朱國禎事蹟與朱國正恰合妻亦節婦劉氏與寧

遠鄉土志亦合寧遠舊爲廣寧中屯前屯二衛地故稱廣寧衛人正禎二字同入八庚韻或係當日採訪之誤故附錄其事蹟以備參考

朱國禎廣寧衛人父歿居喪盡禮力營葬事治墳塋松楸鬱然皆手植也結廬墓側朝夕哭奠如初比初制羸瘠而死妻劉氏艾年守志撫孤成立同時節孝並稱

李暄字明作邑西南新民屯人清歲貢生豐於財樂善好施常年設粥廠凡附近鄰村之乏食者咸往領粥道光十四年大饑除常年粥廠外另設粥廠四方就食者日數百計活人無算至今鄉人稱之

鄧瀛波字心齋清附貢生城西北茸角溝人賦性嚴正不苟言笑居鄉有盛德尤好施與常爲人排難解紛代親友伸雪冤抑對於族人因伯

母孀居年老堂弟德裕少不更事致被官差誣告瀛波挺身出任其事向官府力辯其枉得免所有費用不取償焉光緒二十一年歲大饑時值三月軍旅之後十室九空雖有湖南各處義賑難以徧濟瀛波請于賀前州刺擬照州署所調查之黑松林押兒山二鄉約界災民戶口册按口施放賑糧經手人爲州城商人信興號張洛凌和興裕王洛振見符付糧時紅糧價約十吊小米約十二吊芝麻約六吊綠豆約五吊紅糧小米放罄繼以芝麻綠豆共施糧約合現銀三千餘兩至今縣署有案賀前州刺擬代爲請旌瀛波婉言謝絕後光緒二十五年歲中饑瀛波又施舍賑糧於黑松林一界由紅崖子商號福順永出糧數目約在二三百石二十六年秋因受拳匪影響俄兵肆行騷擾官府無力保護

瀛波慨然奮發舉辦鄉團嚴定規章五日一聚聚則爲兵散則爲民因此賊人遠颺計茸角溝五頂山梨樹溝門一帶二百里內不受蹂躪至今土人德之

文學

吳景春字澤園邑西北小三台人清歲貢生道光初年講學於團山別墅出其門者如朱光宇李鵬展李鵬揚劉汝敬諸人或爲循吏或爲鄉賢其他如鞠樸吳文炤趙毓芝等文學之士指不勝縷同治初元安徽巡撫故城賈臻製關東大師匾額旌其門卒年八十有九

朱鏡涵字春圃城南朱家屯人清道光間歲貢生賦性誠篤幼受業於吳澤園明經敦品勵行鄉里無間其爲文筆勢天矯叙事簡而有法子

汝賡成光緒丙戌進士足徵家學淵源所作文字膾炙人口惜遺墨無多人咸重之

李鵬展字挹汀邑西南新民屯人清道光辛卯優貢生以官學教習授教諭道光二十七年重修州城派爲總監修舉文廟文昌宮奎星樓柳城書院皆出自心裁規制宏敞後出仕直隸同治三年署理廣宗縣以勤儉爲本嚴懲土棍不數月邑大治有夜不閉戶之慶量移他缺邑之在藉紳士河南巡撫鄭元善具稟懇留大府照准又留廣宗一年後官至冀州直隸州卒於官

吳文炤字曉峯號蓮渠城西北小山台人景春子清道光庚子優貢生考充盛京漢教習期滿引見以知縣用因家貧親老故無意仕進文炤

天性最篤胞弟文燿早卒無子祇一女弟郝守節自矢擇姪輩中之賢者嗣之女子趙氏將嫁前數日妝奩被竊殆盡猝難再置郝與女啼恨欲死母孫亦驚憤成疾文炤憂甚遣人四出尋之期在必得人多笑其迂既而賊竟獲物無損失咸以爲孝慈所致云族兄某欲奪文炤園圃以廣其宅詭言先世已析與之時距析居已閱兩世鄉隣悉爲不平文炤怡然與之其雅量不爭如此立身敦品以古人自期見戚友子弟必諄諄勉以孝悌否則不得齒於人語皆剴直他如祭祀之誠義利之辨尤終身兢兢不敢忽焉爲文胎息大家筆姿蒼秀雖極沈悶題能以醒豁出之詩賦蘊藉瀏亮老嫗可解書法毆柳秀勁有致以此才名藉甚一時惟中年失明末竟其才士林惜之

慶春字松岩蒙古人住本城清光緒乙酉拔貢戊子舉人庚寅進士分戶部主事旋應陞中允未就改直隸州分湖北知荆門直隸州事在光緒季年初興學校慶春曾奉文親赴東洋考察政治著有遊東瀛日記未梓已刊本有東政稟稿一冊言日本興國事頗詳後以廢弛公務去職家於京師曾出宦囊創設學校冀謀開復未幾卒

郭鴻逵字脈坡城西紅崖子屯人少歧嶷有大志讀書記誦絕人年二十四補邑庠生數應舉子試未售乃設帳於鄉循循善誘無怠志一時入膠庠者多出其門文思敏捷轉瞬成篇曾撰本邑鄉土志一冊考古證今識者謂其學有根抵焉其處戚黨以慈善爲懷施與不吝處家庭以節儉自勵漸致小康至光緒末葉應局董之選秉公服務素爲官民

所欽佩嗣因精力不佳辭退仍以授徒終其身

隱逸

董柏蒼字雪巖邑西南董家屯人少聰穎喜讀書博聞強記居家孝友無間言行無僞後師事王務之先生於昌黎始聞治心修身之要從此遂致力經史無意進取立身行己純以古人自期一時所與遊者如劉慎齋劉子明周星垣馮建侯李墨林等皆知名之士妻死誓不再娶携子澍在外授徒居無何諸弟求析爨又以所分多不滿意求與兄易皆聽之後弟暨弟婦屢有所貸雖久不償亦弗問也其處戚黨朋友亦然居母喪哀泣過禮不如葷酒以此見重當時其子澍欲聘同姓女爲媳並以昔人有行之者爲請柏蒼曰古今人事實繁凡事而不揆之以理

輒云昔人有行之者此傷風敗俗之所由衆也又曰汝旣廢學暇時可瀏覽經史則是非邪正久之自然分曉遇事庶有把握所作詩蒼老遒勁膾炙人口著有海外山人詩集藏於家卒年八十有一士林惜之李賡唐字月秋邑南關人武庠生國柱之子光緒己丑歲貢生賦性狷介寡交遊幼年知讀書堅苦刻厲年十五即負笈求學百里外前後從朱雲生常嘯谷兩先生教深資啓迪於同治甲戌歲入泮始肆力於舉業以近地無良導師遂赴錦受業於朱子良太史門下及門五年造詣殊深尋赴秋試獲薦未售嗣丁外艱以無昆弟分責遂無意仕進經理家政宣統改元蒙闔邑士紳公舉孝廉方正堅辭不就其恬退有如此者生平爲私人權利事無一字入公門民國六年園房租驟增至園戶

房戶咸以爲請賡唐稍稍增之弗重視也雖納筮生子克繼書香然糟糠念舊終其身無寵庶薄嫡行爲可爲後進模範晚年尤工書摹倣柳碑維肖所書商號匾額端整遒勁人爭寶之末幾卒

耆舊

王元濤字松亭邑東關人清優貢生道光元年舉孝廉方正陞見時蒙清宣宗賜問曰朕奉兩宮皇太后旨議打關東圍記是先走錦縣後走甯遠州元濤磕頭對曰是我皇上奉兩宮皇太后旨議巡幸奉天迴鑾時是先走錦縣後走甯遠州上大悅御筆欽賜孝廉方正第一後官至河南彰德府知府

邵春卿字惠堂本城人清道光己酉舉人庚戌進士籤掣廣西時廣西

值洪秀全之亂無人敢往春卿以書生不更事遂往焉歷官州縣數邑尋陞柳州府知府後以賊匪攻城殉難中丞奏聞子作霖恩蔭雲騎尉李鵬揚字海帆邑西南新民屯人清道光甲午優貢生以官學教習需次縣令咸豐元年選授浙江遂昌縣知縣縣境毘連溫州甌匪時來滋擾百餘年來鄉閭莫安鵬揚訪明匪來之寄窩於二年除夕日帶親信丁役前往勦捕出其不備擒獲匪首李銅錘訊明實情斃於杖下餘匪潛逃終不敢犯鄰邑松陽自此亦無甌患遂松兩邑士民德之在朱村地方建生位祠附以義倉置祭田歲時展祀四年冬調署乍浦海防同知八年春髮逆竄江右而浙境戒嚴衢州府之江山常山爲浙西門戶大府檄鵬揚隨同金衢嚴道繆梓辦理三衢防勦事宜駐紮衢郡五月

間常山告陷旋即克復因積勞嘔血告病乞休歸里咸豐十年間關東地方盜賊蜂起各處土匪結黨作惡鵬揚舉辦鄉團呈請格殺勿論告示先後拏獲放火訛人之棍匪高連登等十數名匪首高連登正法示衆餘匪悉逐境外除暴安良以勸善規過爲己任尋卒里人誦其功德輒感歎不置

李毓楨字子才邑南關人清附生由附貢生隨西安將軍庫克吉泰征回匪蒙保知縣加同知銜歷任直隸贊皇滿城隆平等縣政聲卓著光緒十六年在隆平縣任內因順直水災奇重遵其母李陳氏命捐棉衣二千件經直督李鴻章奏請旌獎於光緒十七年二月十七日奉准在原籍地方自行建坊給子樂善好施字樣光緒丙戌毓楨丁外艱在籍曾倡修城垣又倡議以城工之贏餘補書院之不足寒士賴以霑潤後於光緒乙未年卒士林惜之

李國風字先周邑南關人由清附貢生報捐府經歷分發直隸因充當火藥局差出力保升知縣曆署直隸沙河邢台宣化等縣尋提補萬全縣（張家口等處）知縣在任保升同知後免補同知以直隸州知州升用萬全風俗婦女尙妝飭不事紡績國風爲製紡車數具傳民間老幼婦女入署習之又其婦女不顧廉耻夏日在外輒肉袒乘涼國風出示嚴禁至每逢公出先行使人鳴鑼以便迴避云

李恩霈字子霖邑西南新民屯人優貢生鵬展長子同治庚午舉人官直隸廣平府教諭文風大振後卒於任所

朱汝賡字繼皋邑南朱家屯人歲貢生鏡涵子清光緒丙子舉人光緒初年整頓柳城書院充監院不支薪書院之設汝賡之力居多丙戌進士分直隸即用知縣未幾卒

李如芝字瑞庭邑南關人清附生光緒初元舉孝廉方正以臬經歷歸河南補用後保升知縣歷署甯陵永甯等縣知縣所至有政聲性孝友每以嚴慈逝世不得祿養爲憾故於其父所遺簞室事之如生母恒居以禮自持有不履邪徑之風於光緒甲辰年卒於官

鄭文欽字瑞亭漢軍旗人光緒己卯舉人庚寅進士由翰林院庶吉士散館分戶部主事嗣改道員分發山西光緒二十六年任署歸綏道任內與毓中丞賢同罹戕害教民罪文欽去職在回省途次憂憤仰藥卒

興城縣志 卷九人物 三十二
時年未四十人咸惜之

劉松年字鶴亭滿洲人住河西劉八斗屯光緒乙酉舉人庚寅進士分江蘇試用知縣未獲補署於光緒辛丑年卒

楊慶瑞字雲閣盛京滿洲鑲紅旗人世居邑西北新台門清同治庚午舉人甲戌進士以知縣分發湖南曆任藍山新化巴陵等縣其在署衡陽任內嚴懲罷考不稍寬貸對於士紳插訟慶瑞不假辭色厥後因之斂跡衡州府城原係兩縣過往辦差不勝其繁歷任因無暇聽訟向由道署委員幫審慶瑞日間接送雖勞夜間猶必躬親聽訟惟恐假手他人案有冤抑每月結案比較尤多因之上峯時加獎勵後以清慎勤明長于吏治爲守兼優等考語上聞奉旨以知州升用慶瑞雅爲彭剛直

公玉麟所器重其在衡服官至四年之久者皆暗中維持之力也後于巴陵縣任滿致仕歸田時年六十閱數年乃卒

李麟閣字筱岩邑南關人有幹事才由河南候補府經歷洊升知縣歷官河南商水伊陽等縣知縣當有清末葉麟閣適知伊陽縣事時邑有大股土匪冒稱革軍值寶中丞棻已出走或剿或撫均無人負責遂憂憤成疾共和告成即解組去旋卒

李岱雲字峻卿邑本城人清國學生才具明敏善治事光緒乙未吳湘撫大澂出關征日本過邑憫荒早散放賑米岱雲贊助之庚子之役俄軍到境一切應付岱雲之力居多趙州刺臣翼深資臂助嗣土匪起招撫後又以岱雲馭之時稱爲雲字營賴岱雲日夜勸誡未爲大患地方

亦賴以安凡吾邑商會巡警皆由岱雲創辦其有幹事材亦可見矣
李縉雲字蘊卿邑西北劉屠屯人後徙居本城前清候選同知由光緒三十年起遵照新章創辦學校稟官立案設裕民官帖局以餘利充作學校常年經費立速成師範前後數班及初等高等小學各學校得人
之盛如程慎前尙鵬程張麟楊蔭棠其傑出者任劉君兆蘭爲校長整頓學務不遺餘力民國二年去職呈繳公餘銀二千餘兩留作織廠基金
末幾卒

趙春甲字顯廷邑西關人清光緒戊子武舉己丑武進士以營用守備指分山東需次時值張曜巡撫山左勵精圖治甚蒙優遇屢派短差惟春甲不嫻酬酢故淡於仕進無何以親老請假歸省遂不復出春甲在

籍襄辦地方公益十數年遇有與民興利除弊之事均能破除情面認真調查以故前州刺賀墦欽遲其爲人甚倚重之今其哲嗣鶴年頭角嶄露長教育已數年餘慶之延正未有艾矣

李蓬瀛字芝境邑西梨樹溝門人由清武生蒙署錦州府知府章樾委充綏錦右營管帶尋改編爲巡防統帶光緒三十一年因巡防出力蒙奉天將軍增祺以文職保升知府宣統三年蒙奉天將軍趙爾巽保以道員留奉補用民國元年蒙奉天督都今東三省保安總司令委充奉天全省漁業總局局長兼充帶兵輪事宜民國九年蒙黑龍江督軍孫烈臣調委江省廣信公司及官銀號會辦兼總辦民國十二年公司銀號改組撤消總辦會辦蒙黑龍江督軍吳俊陞委充坐辦蓬瀛少有大

志經其拔擢者以孫烈臣督軍爲最著名尤善理財廣信公司之委任蓋因人擇地也以是年五月卒於江省差次時年五十有九

元

仙釋

劉秉忠本瑞州人（按瑞州今興城縣境）因曾祖官邢州徙家焉初名侃字仲晦少補邢臺節度使令史慨然投筆去隱武安山中遂從浮屠法更名子聰後遊雲中留居南堂寺世祖在潛邸時海雲禪師被召過雲中聞其博學多材藝邀與俱入見應對稱旨屢承顧問秉忠於書無所不讀尤邃於易及邵氏經世書至於天文地理律歷三式六壬遁甲之屬無不精通世祖正大位一世規模制作皆所草定賜第奉先坊拜

光祿大夫太保參領中書省事至元十一年扈從至上都築精舍於南
屏山居之秋八月無疾端坐而逝（按劉秉忠在元旣以勳名顯貴位
至師保本不當以釋目之然其始也寄跡山林其沒也亦以蟬脫是終
始以禪蛻者也故仍志之仙釋）

興城縣志卷之九

人物下

烈女

氏族

興城縣志

卷九人物

三十七

興城華昌印刷局印

烈女

貞女

明

孟姜許氏

清

姚法珠未婚之妻賈氏

民國

姚永緒字大忠前寧遠正紅旗佐領慶韜之少女也慶韜生子二長永祺次永賡少女即永緒女年十二母故兩弟俱幼父恐前室兒女失蔭不忍繼娶永緒晝製衣履夜伴讀書卒撫兩弟成立無何長弟永祺夭

興

城

縣

志

卷九人物

三十八

興城華昌印刷局印

逝永緒經此棖觸矢志不嫁伴弟婦金守孀慶韜行年八十有疾永緒躬侍湯藥辛苦備至洎歿永緒麻經墨面輔次弟永賡喪葬如儀尋永賡亡弟婦呂又嫠永緒守貞之志益堅律已冰霜以端表率持家勤儉若將終身初永賡在日感姊恩刻骨屢以婚事爲言永緒慨然曰姊有不肖舉動爲弟所窺耶人各有志以吾家尙豐何虞無羸糲啖我姊弟遂相對而泣從此不敢復請民國九年永賡同叔父趾祥挽戚在京請褒蒙前大總統徐世昌給予至性過人字樣併授黃綬徽章以嘉貞孝永緒以自慚德薄屢阻懸額遲至民國十四年八月念六日始迫於叔父命製額懸掛時年已五十有一也戚友知其事者咸贈聯表揚藉伸敬忱云

佟萬成之女城西二十里二道邊人自幼未聘矢志不嫁現年五十三歲鄉里以貞女稱之

節婦 凡已嫁殉夫及已嫁殺身以拒強暴者則謂之烈婦

谷薦馨妻田氏寧遠州人守節三十餘年平時親黨罕有得見者其謹慎若此

趙世祿妻董氏甯遠州人夫亡家貧奉姑至孝守節數十年

吳來尹妻趙氏寧遠州人夫亡事祖姑及姑以孝著一門三孀闔儀整肅尤堪矜尙

王守良妻李氏寧遠州人夫亡辛苦撫孤教子詩書及長成立曰吾夫有嗣吾無憾矣

溫成祥妻王氏寧遠州人守志食貧織紉以給饗殮節孝尤彰

王六妻楊氏寧遠州人夫死氏艱苦備嘗呼天誓志至死不移

王進才妻孫氏甯遠州人女德素嫻及夫亡志凜冰霜貞操彌著（俱於清雍正三年旌表）

趙廷弼妻張氏甯遠州人夫亡氏耐守清貧艱辛萬狀人稱苦節

劉成業妻馬氏寧遠州人氏青年喪夫哀毀骨立貞一之操垂白盟心（俱於清雍正九年旌表）

廩生梁維屏妻張氏寧遠州人夫亡守節二十餘年勤奉翁姑訓子成立

溫自選妻王氏甯遠州人夫亡守節三十餘年事姑盡孝撫孤完節

杜爲禮妻楊氏寧遠州人夫亡守節三十餘年事奉孀姑訓誨子女不惰不倦鄉鄰俱爲稱歎

趙仲金妻張氏甯遠州人夫亡守節二十餘年奉姑克盡孝道撫孤成立守志安貧

辛朝選妻李氏寧遠州人夫亡守節三十餘年敬事孀姑撫養幼子閨門肅有禮法

趙連茹妻張氏寧遠州人夫亡守節二十餘年上事孀姑下撫孤嗣有孝慈聲

李進孝妻馬氏寧遠州人夫亡守節三十餘年堅耐清貧撫孤成立

崔崇妻陳氏直隸臨榆縣人寄居寧遠夫亡守節二十餘年上事繼姑

下訓幼子孝慈兼盡

李養妻李氏甯遠州人夫亡守節三十年家赤貧針紉事姑撫子成立孝節無虧

劉天祿妻崔氏甯遠州人夫亡守節三十餘年孝奉翁姑撫養孤子矢志終身（俱於清乾隆四年旌表）

郭洪基妻王氏寧遠州人夫亡守節三十餘年奉事孀姑能體其心撫子成立艱苦備嘗

李進富妻王氏寧遠州人夫亡守節四十年奉老育幼堅貞之操風動鄉黨

許大成妻曹氏甯遠州人夫亡守節三十餘年備歷艱苦訓子成立

楊守富妻溫氏寧遠州人夫亡守節三十餘年上事繼姑曲盡婦道撫孤有成克守宗祀

宋九思妻劉氏甯遠州人夫亡守志四十年奉姑撫幼節著堅貞 俱於清乾隆十六年旌表

劉天榮妻張氏寧遠州人夫亡守節四十餘年堅耐清貧久而彌勵

呂萬魁妻趙氏寧遠州人夫亡守節四十年勤奉孀姑克盡孝道撫養幼子苦志完貞

常思明妻黃氏寧遠州人夫亡守節四十餘年食貧完節孝奉孀姑撫孤成立

劉登科妻潘氏寧遠州人夫亡守節三十餘年事姑進禮撫孤有成允

稱孝節

許碧妻周氏甯遠州人夫亡守節四十餘年家無升斗奉姑克盡孝養菽水之歡未嘗稍缺（俱於清乾隆十七年旌表

石越凡妻楊氏甯遠州人夫亡守節三十餘年家貧矢志撫子成立龔俊妻李氏寧遠州人夫亡守節三十餘年家貧針紉奉姑甘旨撫子成立咸稱孝（俱於清乾隆二十二年旌表）

張景龍妻劉氏寧遠州人夫亡守節三十餘年孝奉翁姑克盡婦道（清乾隆二十六年旌表）

劉國卿妻劉氏甯遠州人其翁夤夜入室圖奸氏守正不污投繯殞命節烈懋著（清乾隆三十七年旌表）

邱萬倉妻李氏寧遠州人夫亡守節三十餘年勤奉孀姑孝行尤著（清乾隆三十九年旌表）

倪華兆妻姚氏甯遠州人夫亡守志五十餘年事奉翁姑生養死葬皆針紉拮据撫孤成立艱辛備至貞操最爲堅久（清乾隆四十二年旌表以上見盛京通志）

節婦孝子朱國政之妻劉氏

烈婦劉國卿妻劉氏

烈婦趙毓蕃之側室王氏

節婦崔崇妻陳氏

節婦張大鵬妻姚氏

節婦陳凝妻張氏

節婦梁成邦妻李氏

節婦趙大用妻馮氏

節婦劉登舉妻潘氏

節婦杜維禮妻楊氏

節婦趙連茹妻張氏

節婦張會雲妻雷氏

節婦白萬聰妻張氏

節婦李義妻李氏

節婦倪華兆妻姚氏

節婦邱萬倉妻李氏

節婦張維繼妻田氏

節婦王勤妻溫氏

節婦巫文魁妻蕭氏

節婦趙恕妻陳氏

節婦張景龍妻劉氏

節婦馬甄妻劉氏

節婦趙公妻張氏

節婦劉英妻張氏

節婦甯景武妻左氏

節婦常思明妻黃氏

節婦龔俊妻李氏

節婦劉步蟬妻單氏

節婦李進學妻馮氏

節婦劉元榮妻張氏

節婦關承業妻王氏

節婦陳文凝妻徐氏

節婦王家興妻萬氏

節婦溫自選妻王氏

節婦李芳妻張氏

節婦郭景春妻李氏

節婦明璐妻陳氏

節婦許大成妻曹氏

節婦趙應時妻王氏

節婦劉廷選妻胡氏

節婦王元浩妻岳氏

節婦吳文著妻郝氏

節婦李進富妻王氏

節婦梁維屏妻張氏

節婦高文妻陳氏

節婦高登科妻李氏

節婦郭洪基妻賈氏

節婦呂萬魁妻趙氏

節婦宋九思妻劉氏

節婦劉天祿妻崔氏

節婦王煦維妻汪氏

節婦石超凡妻楊氏

節婦朱國翔妻王氏

節婦王觀生妻錢氏

節婦陳守仁妻穆氏

節婦楊守富妻溫氏

節婦趙仲金妻張氏

節婦馬世太妻王氏

節婦許碧妻周氏

節婦劉永金妻谷氏

節婦辛朝選妻李氏

節婦郭環妻李氏

節婦范湖妻周氏（以上錄節孝祠）

武庠生李國華之繼室李氏邑東南海山人年二十歲來歸國華性溫
和貞靜撫前妻所生遺子一遺女四如己出同治元年夫故氏年二十

六歲以柏舟自誓守志撫孤里人咸稱其賢嗣遺子故躬率孀媳楊氏

過度清白貞潔蓋數十年如一日焉卒年七十四歲計守節四十九年

李希謙之妻劉氏邑南關人劉俊臣之次女也性貞靜和順年十七爲

希謙室二十四歲夫故矢志守節始終無二奉孀姑以孝聞撫子女三

人長鴻魁次鴻恩遺腹女一均各成立女爲前清吉林伊通州知州王

榮昌室遺產薄田僅十畝餘賴氏以女紅勤儉度日現家道頗稱小康

殆氏之茹苦含辛有以致之現年六十九歲計守節四十五年

李希讓妻薛氏年二十來歸希讓二十四歲夫故矢志守貞生遺腹女

一撫養成立無子奉孀姑以孝稱現年六十四歲計守節四十年

王純源之妻梁氏邑西北大山台人年十九于歸純源二十三歲夫亡

守志不渝越二年姑逝其翁又續娶後姑生一子純昌翁尋沒氏與其後姑度日情同生母共撫夫弟純昌成立至四十餘歲始過胞弟純澤子之良爲嗣現年六十歲堪稱竹節松筠

陳永吉之妻王氏城北白家甸人年十九適永吉爲繼室二十六歲夫病故矢志守節而家貧無子翁姑年老因勸其嫁氏曰翁姑以無子故始過子娶媳今子亡媳再嫁二老將誰倚從此矢志靡他勤紡績以供菽水及翁姑相繼病故氏鬻簪珥殯葬後欲仰藥從侍地下遇救得甦人問其故氏曰翁姑沒吾事畢矣聞者皆淚下後不得已以遠族陳永萬子名殿魁者爲嗣殿魁農人粗識字義事之尤孝人咸謂節孝之報云邑紳咸嘉其節代氏請旌立碑於白家甸村北氏享年七十九歲弄

孫三人及病知死期含笑而終

董長生之妻王氏邑西南董家屯人年十五來歸長生性仁孝勤女紅二十九歲夫故以柏舟自誓守志撫孤初氏甫過門日爲兩大姑所問未能得姑歡心一日命裁衣弗與剪請於其姑怒詈相向氏隱忍弗與較歸房自取剪裁成之以獻其姑爲二女所構送烟送茶故意不按甚至加以怒罵氏怡然受之侍立良久必待霽顏然後去而毫無怨心及姑臨終氏問所欲言姑徐曰汝平日能作家率兒度曰汝二姊家給人足吾無所惦念所最關心者汝大姊之孤苦耳汝善視之吾泉下瞑目矣言訖遂卒氏哀慟治喪盡禮先是其姑善蓄積遺金滿篋旣葬兩大姑給氏以要事他往及歸兩大姑將其母所蓄金盡納包裹中瀕行以

二壯夫力扛猶不勝焉氏明知其伎倆以姑遺囑故殊不介意弗與較也從此銳意治家教子而外惟思以餘饒潤姊餽遺不殊曩時而大姊家道日落時來依母家生活刁難毒詈有時仍其故態時氏年已七旬餘髻髮頰白往往率諸婦暨諸孫婦侍立於側不去以平其怒蓋數十年如一日焉會大姑死氏爲營衣衾棺槨一從敦厚跡其生平行事知遵姑氏遺囑而不知有宿怨以忠恕二字爲圭臬但罪已而不罪人雖士夫無以加焉韓魏公有言惟父母不慈而子不失爲孝乃爲可稱若氏其庶幾乎惟當年旌表已請而無力建坊惜哉

梁國翰之妻穆氏夫故矢志守節奉姑教子僉稱孝慈艱苦備嘗始終不渝清同治十二年立坊於城西南十二里曹莊村東

趙智之妻孔氏青年守節撫孤成立含辛茹苦里黨賢之清光緒三十年立坊於城南六里頭台子村西（並詳本志古石坊）

蘇永利之妻李氏青年矢志始終完節清光緒十八年奉旨立碑於城西南九里二台子村西（並詳本志古碑額）

王節婦董氏城西南曲尺河堡人年十七于歸十九歲夫故僅遺一女過族人王忠義爲嗣現年七十四歲苦節五十餘年

朱節婦馬氏城西南曲尺河堡人年十九于歸二十七歲夫故現年七十歲苦節四十餘年

楊明之母楊張氏城西南望海甸人於二十二歲夫故現年六十六歲守節四十四年

于永和之母曹氏城西南烟台河人於三十歲夫故現年七十二歲守節四十二年

劉喜懋之妻孫氏城西南廠子溝人年十七于歸二十五歲夫故遺五歲子一苦守柏舟撫孤成立族黨賢之年八十九歲卒守節六十餘年現其家住宅尚有府衙門之稱以該氏守節時非至親不得入其門故也

李暢然之妻邢氏城北梁家窪子人年十七于歸二十九歲夫故矢志守節事翁姑以孝聞教二子以有方著里黨稱賢於民國十二年冬贈以竹節松齡四字橫額以表揚之現年七十三歲守節四十餘年

李福雲之妻滕氏城北下砬山人年十七于歸二十二歲夫故守志食貧事孀姑以孝稱撫繼子如己出誓死靡他歷盡艱苦現年七十三歲守節五十餘年

李春坡之妻魏氏城北下達子溝人年十七于歸二十六歲夫故矢志柏舟孝養翁姑食貧無怨里黨賢之現年六十二歲守志三十五年
李夢庚之妻王氏城北下達子溝人年十七于歸二十六歲夫故安貧守節孝養舅姑現年六十一歲苦節三十五年

丁作廣之妻谷氏城北丁家嶺人年十五于歸二十二歲夫故遺子女各一家素貧氏矢志冰霜紡績度日教子有方至於成立現年六十五歲守節四十餘年

劉鍾秀之妻陳氏城北白塔峪人年十九于歸二十一歲夫故無子孝

事翁姑撫育繼子勤紡績以度日鬻釵鈿以葬親卒年五十六歲守節三十五年

邵鼎之妻梁氏城西南人年二十二歲夫故矢志守孀敬事翁姑二十餘年始終如一鄉鄰欽其節孝清宣統元年九月奉旨旌表褒予品重璇閨四字橫額現年七十歲守節四十餘年

張永豐之妻郭氏城西南後王家屯人年二十九歲夫故矢志守孀食貧茹苦老而彌堅清宣統元年經本界紳董候選直隸州州判劉紹文等公舉節孝予以竹節松齡四字橫額卒年八十一歲

張慶鐸之妻石氏城西南後王家屯人年二十三歲夫故矢志柏舟孝事翁姑三十餘年如一日鄉鄰咸稱賢孝卒年八十四歲守節六十餘年

年

聶林之妻謝氏城西南李相屯人年十九于歸二十七歲夫故遺子二奉養翁姑克盡孝道教子成立漸致小康現年七十二歲守節四十五年

劉順之妻張氏城西南馬蹄溝人年十七于歸三十歲夫故遺子一家綦貧以紡績度日上事翁姑下撫幼子僉稱孝慈家道漸致小康現年七十八歲守節四十八年

陳節婦晏氏城西南二台子人年十九于歸二十七歲夫故遺子二女一敬事翁姑曲盡孝道教養均各成立鄉里稱賢公送節孝無雙四字橫額以表揚之現年七十八歲守節五十一年

汪銀之妻薛氏城西南汪家屯人年十七于歸十八歲夫故青年矢志
孝事翁姑卒年七十五歲守節五十七年

佟金香之妻劉氏城西南楊樹溝人年十七于歸二十一歲夫故矢志
不貳節勵冰霜現年六十三歲守節四十二年

楊青林之妻劉氏城西南四間房人年十七于歸二十八歲夫故無子
矢志守貞撫繼子如己出家道清貧備嘗艱苦現年七十歲守節四十
二年

楊萬祿之妻孫氏城西南四間房人年十九來歸二十歲夫故青年嫠
處動守禮節人無間言現年六十二歲守節四十二年

張振芳之妻謝氏城西南吳家屯人年十九于歸二十九歲夫故遺子

二女一勵節松筠撫孤成立克繼家聲里黨以賢母稱之現年七十一
歲守節四十二年

馬廷舉之妻張氏城西廣糧堆人年二十一于歸二十九歲夫故遺子
一矢志不嫁家貧以紡績度日上事翁姑下撫幼子僉稱慈孝現年六
十五歲苦節三十六年

趙鵬齡之妻曹氏城西披甲屯人年十九于歸二十五歲夫故矢志柏
舟家素貧以紡績爲生活撫繼子如己出鄉里稱賢卒年七十五歲守
節五十年

田萬金之妻魏氏城東關人性賢淑尙氣節年十七于歸萬金三十六
歲病沒氏年三十而寡生一女二子年俱幼家窶貧氏茹苦含辛矢志

不二姑老多病侍奉維謹然生計艱難惟恃紡績針黹度日雖饔飧不給衣服不完晏如也姑沒後家人暨母族咸勸其嫁百計陳說氏心如鐵石終不爲動教育子女苦守柏舟現年七十計守節四十餘年長子學成次子學周年俱四十餘在外經理商業克自樹立家道小康人皆謂天之報施節婦者爲不爽云

祖文璽之妻武氏邑人武悅桐之女也幼讀書頗知大義有同胞弟若妹共九人凡提携縫紉氏輒挺身任勞父母甚利賴之年二十一于歸時翁已沒事姑以孝聞翌年其夫溺河死氏撫屍慟絕及甦屢欲觸棺飲溲自殉因衆救不果最後氏父武悅桐以義宜孝姑延嗣相勗從此竭力事姑撫夫兄子廷恩爲繼子如己出氏年三十六歲時氏母病革

歸侍湯藥者月餘及沒痛不欲生以姑老子幼不能廢離遂喪葬盡禮而返尋氏父病重歸侍一如母病時並焚香祝天願減己算延親壽父病果愈此舉雖近迷信然至性愚誠不可及也越數年姑病氏則夜不交睫者數十日而姑始沒以此積勞形瘦骨立年五十一遂沒跡其生平事蹟孝行節義有足多者殆所謂無愧倫常者歟

王汝舟之妻錢氏城西南三間房人年十九于歸二十四歲夫故青年矢志白頭不改壽七十三歲卒守節五十餘年

王汝欽之妻張氏城西南三間房人年二十一于歸二十四歲夫故六十九歲卒守節四十餘年歷盡艱苦垂老霜操彌堅

石金之續妻陳氏城南朱家屯人年二十三于歸二十五歲夫故守節

事翁姑以孝聞撫一歲子如璋至於成立爲清增生度日節儉漸致小
康壽五十八歲卒

姚世成之妻楊氏城南朱家屯人年十九于歸二十歲夫故守節事姑
克盡孝道撫嗣子以慈著鄉里稱之壽五十歲卒

楊麗堂之妻姚氏城南朱家屯人清貢生姚士璵之女年十七于歸三
十歲夫故有子方二歲矢志守節子歿又過孫以延宗祧勁節不渝現
年八十歲

陸鳳山之妻趙氏城南朱家屯人年十九于歸二十七歲夫故矢志守
節孝事翁姑教育繼子人稱完節壽五十六歲卒

張正永之妻李氏城南朱家屯人年十七于歸十八歲夫故立志守節
家綦貧勤針指以奉事翁姑撫養繼子尤善醫小兒病里人德之壽七
十三歲卒

聶信之妻劉氏城北雙樹堡人年十七于歸二十三歲夫故守節教子
有方務勤儉以成家業於六十二歲卒鄉里僉稱賢婦

侯德發之妻王氏城東南關人年十九于歸二十三歲夫故矢志柏舟
事姑教子以孝慈著卒年六十七歲守節四十餘年

劉振舉之妻牟氏下長茂河人年二十二歲先於十七歲歸劉氏平日
孝事衰翁伉儷甚篤十四年五月十八日晚九時適駐興三十九旅八
十六團一二兩營以俘虜改編之軍隊六百八十餘名鳴鎗譁變連夜
向城北逃逸翌晨日出時抵該村逃兵入劉氏院者四有至該氏室者

豔氏年齡突起淫念逐其翁外出氏恐被污亦奪門出逃兵以未遂其所欲忿鎗擊之彈由背後穿小腹出本村聞耗鳴鐘聚衆逃兵遂相率逸去迨其夫回家看視該氏已氣息僅屬仍口述與逃兵拚死抵抗情形遂絕夫鎗逼之下何求不遂該氏以青年幼婦竟能不爲威怵致命全貞其節操堅定洵過人矣

吳文著之妻郝氏城西北四十里小山台村人年十七于歸二十二歲夫故操凜冰霜鄉里賢之卒年六十七歲守節四十五年清同治年間請旨建坊旌表（並詳古石坊）

周伯之妻楊氏城西三十里周家屯人年十七于歸十八歲夫故茹荼捋苦誓不二志守節五十餘年清光緒十五年氏年六十二歲奉旨建

坊旌表

徐亮之妻張氏城西十八里榆樹林村人年十七歲于歸二十七歲夫故遺子一孝事孀姑慈育幼子現年六十七歲苦節四十年

傅連陞之妻馬氏城西三十里古城子人年十七于歸二十六歲夫故遺子一家貧以針黹度日撫孤成立現年六十六歲苦節三十九年

李景元之妻馬氏城西三十里周家屯人年十七于歸二十二歲夫故遺子一矢志不嫁撫育幼孤至於成立現年八十三歲守節六十餘年

張永貴之妻王氏城西北三十里馬溝屯人年十七于歸三十九歲夫故子一家貧以紡績度日以耕讀教子卒年八十三歲守節四十餘年

李勤之妻張氏城西北三十二里廟溝屯人年十七于歸二十二歲夫

故節勵冰霜始終無間卒年八十二歲守節六十年

周連雨之妻張氏城西北四十里舊門屯人年十七于歸三十四歲夫故子一矢志柏舟垂老不渝卒年七十四歲守節四十年

王國相之妻趙氏城西北四十里舊門屯人年十七于歸二十九歲夫故遺子女各一矢志堅貞撫孤成立卒年六十七歲守節三十八年

王連舉之妻張氏城西北四十里舊門屯人年十七于歸二十六歲夫故子一勁節不渝撫孤成立卒年六十四歲守節三十八年

李萬有之妻侯氏城西三十里梁家屯人年十七于歸二十九歲夫故遺子女各一教養成立皆有義方戚族額其門曰冰霜之操卒年九十歲守節六十餘年

王永順之妻牟氏城西三十里東檢金溝人年十七于歸二十歲夫故

青年矢志茹苦終身卒年六十六歲守節四十餘年

劉德仁之妻王氏城西四十里黃家屯人年十六于歸二十九歲夫故遺子一立志不嫁教育有方卒年六十六歲守節三十七年

楊德之妻劉氏城西三十里小楊樹屯人年十九于歸二十六歲夫故堅持清節鐵石不磨現年七十歲守節四十餘年

榮緒之妻姜氏城西三十里邊壕子村人年十七來歸二十一歲夫故遺子女各二家貧以紡績度日雖境處饑寒而貞一不二現年六十八

歲守節四十七年

何有連之妻劉氏城西三十里邊壕子村人年十七來歸三十歲夫故

遺子女各二事親教子咸盡其道現年六十九歲守節三十九年
榮自萬之妻王氏城西三十里邊壕子村人年十七于歸二十一歲夫
故遺子二甘心茹苦撫孤成立卒年六十八歲守節四十餘年
李萬恒之妻程氏城西五十里大水泡子村人年十七于歸三十一歲
夫故遺子二矢志撫孤貞行無二卒年六十八歲守節三十七年
劉張氏係武庠生劉仁輔之妻十七歲于歸次年夫故氏痛不欲生經
伊母再三勸慰乃止自是矢志守節孝事翁姑歷三十四年如一日至
光緒十三年八月姑故停靈七日仍守喪如儀遂絕粒食姑靈未出而
逝隨姑入塋夫堂兄昭輔擬挽戚在京請旌以氏夫胞弟吝貲中止邑
人哀之

李步瀛之妻趙氏長嶺子屯人年十八于歸十九歲夫故遺前房子一
甫睽撫養如己出翁姑相繼歿殯葬如禮家貧以紡績度日教子成立
現年六十九歲苦節五十年

王國翰之妻馬氏城西南十八里後湖村人年十九于歸二十六歲夫
故立志堅貞動循禮法卒年五十九歲守節三十三年

劉永湖之妻孔氏城西南十八里後湖村人於十二六歲夫故秉志貞
潔人無閒言現年六十一歲節守三十五年

王國風之妻王氏名光增城西南後湖村人其夫王國風於清光緒二
十一年外出迄今三十餘年未歸氏守志不移閨儀整肅現年已五十
五歲於民國三年在本村設立女小學校教誨有方成績頗著鄉里咸

稱賢德

吳景安之妻姜氏城內人年十七于歸二十二歲夫故遺子一甫四月翁姑年皆六旬事老撫幼咸稱孝慈子名殿卿於氏年五十三歲時病故家綦貧氏與孀媳李氏紡績度日教孫森讀書數十年如一日現年六十八歲苦節四十六年

朱煥閣之妻劉氏城西南沙河所人年十七于歸十九歲夫故遺一女纔數月上事翁姑下撫弱女艱苦經營終無二志及翁姑病時氏親侍湯藥及歿喪葬以禮尤爲孝義兼全現年五十八歲苦節四十一年王世榮之妻楊氏城西南三間房人年十七于歸十九歲夫故氏旣無子女冰霜勵節始終不渝卒年六十九歲同治年間奉旨旌表

郭應麗之妻馮氏本城人年二十一于歸逮事翁姑以孝聞伉儷甚篤僅七閱月又二日而夫故氏悲痛不已冰霜矢志以三門次子承惠繼時方襁褓撫養如己出及七齡遂遣入學歷肄業於奉天興華書院天津南開學校卒得北京中國大學商學士學位氏之素志以償卒年七十二歲計守節五十年現蒙奉天省長莫援例題褒給予志潔行芳字樣併獎給白綬銀質褒章

氏族

祖氏 其先世爲商祖己之裔晉以後世居范陽至鎮西將軍遯之少子始流寓於滁歷數十傳至明有諱世榮字遠揚者於元至正十五年佐明太祖起兵洪武六年改遼東行省爲衛所隨都督何世隆駐

定遼中衛是爲祖氏出關入遼之始卒贈承信校尉子二長興洪武十八年設滁州衛所以功補總旗次忠建文四年陞正百戶承信校尉永樂元年改調定遼中衛正百戶世襲忠子原承襲正百戶官承信校尉追贈宣威將軍原子慶承襲正百戶官承信校尉宣德五年改鎮甯遠衛遂家焉是爲祖氏居寧之始卒贈宣威將軍慶子二長述甯遠衛正千戶正統八年追贈武節將軍次起正統九年襲正千戶官武節將軍景泰四年陞甯遠衛指揮僉事封宣武將軍追贈定遠將軍起子二長綱承襲指揮僉事宣威將軍追贈定遠將軍次純追贈榮祿大夫綱子旺承襲指揮僉事宣威將軍陞指揮同知封定遠將軍贈昭毅將軍純子鎮太學生命以十字名其子孫卒贈榮祿

興

城 縣 志

卷九人物

五十七

興城華昌印刷局印

大夫並誥贈少傅特進光祿大夫右柱國旺子武官遊擊指揮使掌印封昭毅將軍鎮子三長仁性嗜飲有大志見族人貧困者必周濟之解推不吝萬歷間誥贈榮祿大夫崇禎三年誥贈少傅特進光祿大夫右柱國次義誥贈昭毅將軍三禮誥贈昭毅將軍武子承大承襲指揮同知廣寧右屯衛防禦封定遠將軍仁子三長承祿未仕次承訓明萬歷間官遼陽副總兵左軍都督府三承教任寧遠指揮僉事兼中後所遊擊義子承業明神宗時累官指揮同知誥封定遠將軍承大子大松官指揮同知封定遠將軍承訓子三長大壽明萬歷間官提督遼東關寧十三營官軍掛征遼前將軍印左軍都督府後以恢復灤永功加少傅次大弼明萬歷間官陝西寧夏總兵掛平西

將軍印左軍都督府加太子太保三大成明萬歷間官叅將承教子
二長大定襲指揮僉事官至遼東寬甸營叅將誥贈太子少保次大
樂官至遼東前鋒營東協副總兵承業子四長大榮承襲指揮同知
誥封定遠將軍次大助累官至都司指揮僉事誥封宣威將軍三大
培明懷宗時累官陝西靈州叅將誥封昭毅將軍四大眷承襲指揮
僉事提標都司清太宗時拜他喇哈番世職大賢承功子甯遠衛武
庠生累官至遊擊大民甯遠衛學庠生庚午選貢明懷宗時累官河
南歸德府寧陵縣教諭陞鳳陽府天長縣知縣大明承惠子明熹宗
時官陝西寧夏叅將陞鎮標副總兵誥封定國將軍大松子澤濬廕
監生官廣東新惠縣知縣又任從化縣知縣大壽子六長澤溥明崇
禎間官陝西經略中軍副總兵清任御前一等侍衛順治間官山東
總督康熙間官福建總督次澤淳明崇禎間任錦衣衛指揮同知清
任御前一等侍衛又正黃旗副都統三澤清康熙間官廣東高州總
兵四澤深清康熙間官江南淮海宣府口北江南松常湖廣荆南各
道五澤汪清康熙間任戶部河南司員外郎六澤浹清康熙間充正
黃旗佐領大弼子二長澤潛清順治間進士官至浙江提學暨河南
督糧各道次澤溶清康熙間舉人官至江西南康府知府大定子三
長澤洪襲指揮僉事官至遼東平彝營副總兵清順治間任吏部左
侍郎兼纂修實錄館總裁次澤沛明崇禎間官參將三澤遠明崇禎
間官遼東杏山營副總兵清崇德間任禮部侍郎順治間加平南將

興

城 縣 志

卷九人物

五十八

興城華昌印刷局印

軍鎮守杭州尋提督江南官至川湖總督兵部尙書加太子少保大
榮子澤裕明懷宗時承襲指揮同知大眷子澤原清世祖時拜他喇
哈番世職官副都統大民子澤宜明宏光間恩貢清世祖時任浙江
嘉善縣縣丞大明子澤浯清康熙年間由廕生任廣東龍門縣知縣
順天武清縣知縣陞河南彰德府同知雲南沅江府知府澤盛大貴
子明懷宗時累官至都司授三品服俸清世祖時誥封資政大夫澤
厚大貴子清世祖時任陝西固原遊擊直隸霸州參將江南寧國府
參將廣東惠州府副總兵澤濡大錫子清聖祖壬子科武舉任廣東
瓊州守備澤裕子建韓清康熙間官湖廣竹山營把總澤源子建德
清世祖時官鎮江駐防驍騎校澤盛子二長建衡清順治丙戌歲貢

興

城 縣 志

卷九人物

五十九

興城華昌印刷局印

生初任山東兗州府金鄉縣知縣歷任福建按察司廣西布政司順
治十七年卒於官欽賜御祭康熙年間入祀福建名宦祠次建極清
世祖時任鑲黃旗佐領陞參將福建副都統澤浯子良屏清康熙間
任河南舞陽縣知縣凡十有二代簪纓不絕按其譜牒分流別派又
有所謂遼東北宅一支者斷自九世始九世祖承忠明代甯遠衛正
百戶傳至十一代澤潤明懷時官遼東招練營副總兵清太宗賜一
品服俸世襲澤潤清順治辛卯舉人壬辰進士官山西隰州知州四
川達州知州廣西梧州府知府福建鹽運司澤茂清順治戊子考貢
官福建南安縣知縣澤潤子四長植柏清初官陝西白河縣知縣戶
部員外郎正黃旗佐領次植棟清正黃旗佐領三植松清世襲一等

侍衛正黃旗副都統四植桂清二等侍衛植桐世臣子清監生任山東朝城縣知縣陞陝西慶陽府同知植春世祥子清鑲白旗參領陞副都統植檜世祥子清鑲白旗參領陞陝西駐防副都統澤闔子二長建樞清廕生官順天南樂縣知縣湖廣岳陽縣知縣次建藩清正黃旗廕監生官四川建始縣知縣澤茂子二長良佐清廕生浙江駐防防禦次良籌清佐領陞參將植棟子允圖清正黃旗廕生官陝西綏德州知州刑部江南司員外郎戶部雲南司郎中江南龍江關抽分山東兗州府知府陝西督糧道良籌子允休清乾隆癸酉舉人候選知縣至此凡傳十三世家稱列戟里著鳴珂爲本邑世族之冠今子其孫在籍者多業農商尙稱小康

張氏 其先世肇基青陽諸族散處歷漢迄明千餘載傳至諱留注者始以指揮同知由上蔡移廣甯從此世守弗替是爲張氏之始祖留注以下世及斌玉敬昇表凡六傳俱廕顯秩表子鳳儀官參將鳳儀子九思官薊遼參將九思子應种世襲都指揮同知陞遊擊將軍擢山海關參將調甯遠衛參將改開原左參將陞副將誥封定國將軍子士彥字東越生而奇嶷器識英睿值遼陽失守清太祖武皇帝延攬英雄士彥仗劍以從官驃騎將軍管佐領事累晉秩都堂世襲阿達達哈哈番子三長朝璘字溫和世襲三等阿達達哈哈番陞一等阿達哈哈番兵部職方司郎中累陞一等阿思哈尼哈番管副都統事都察院左副都御史戶部左侍郎江西巡撫加宮保銜陞江西總督福

建總督太子少保兵部尚書兼都察院右副都御史正一品次朝瑞字祥如河南登封令補授山東道監察御史巡按湖北三朝珍字玉如由刑部他齊哈哈番陞工部啓心郎歷拖沙喇哈番加拜他拉布勒哈番督捕右理事管佐領參領事提督操江巡撫安徽池太廬鳳廣滁等處加工部尚書巡撫湖廣等處地方提督軍務兼理糧餉兵部尚書都察院右副都御史正一品朝璘子長聖碩字子厚官巡視中城監察御史管佐領事次聖弘字子遠恩蔭授湖廣岳州府澧州知州三聖謨字子顯恩蔭官大理寺寺正四聖弼字子良恩監候補主事五聖詔字子明恩監候補大理寺寺正朝瑞子長聖清恩蔭候補主事次聖錫恩蔭候補同知朝珍子長聖猷字嘉侯恩蔭大理寺

興

城 縣

志

卷九人物

六十一

興城華昌印刷局印

左寺正刑部廣東清吏司員外郎次聖經廩膳生候補主事三聖佐四聖簡均太學生候補同知五聖德六聖敬均太學生候補知縣今傳十餘世

柏氏 其始祖世居江南自四世祖本二公於明洪武四年調撥遼陽五世遂居關東按其家乘亦斷自五世肇修焉五世祖真以下世代相傳經旺浩英瑾鳳凡六代均襲父職蔭指揮使旺與鳳更晉封將軍至於朝用朝勳朝楣朝瞻朝重朝忠於次序爲七代於譜牒則爲十一世祖朝用子世爵官參將誥贈榮祿大夫勅封鎮國將軍子二長永馥初授他喇布勒哈番晉一拖沙喇哈番清順治三年署四川永甯總兵後因殺賊搖黃等有功加左都督八年實授總兵官康熙

三年由陝西西甯總兵陞本省平涼提督次永慶末仕永馥子二長
天祐世襲阿達哈哈番康熙十六年隨征開府廣東補授虎頭副將
協理總兵事務三十九年管佐領事務次天儲由侍衛管佐領順治
十八年出征永利在湖南陣亡贈一拖沙喇哈番入祀忠臣廟天祐
子三長遐年世襲三等阿達哈哈番署佐領次堯年康熙十三年由
監生吏部考授州同三嵩年由監生中式康熙庚子科武舉効力漕
標襲三等阿達哈哈番遐年子之瑞文庠生永慶子天成溫州營遊
擊天成子嵩琪康熙五十九年官鄧州知州誥授奉直大夫嵩琪子
之芬文庠生朝勳子世桂選貢授教職子二長永年文庠生次永吉
未仕子天魁官遊擊將軍天魁子二長成棟次成樑成棟字懋貞初

興

城 縣 志

卷九人物

六十二

興城華昌印刷局印

任河南彰德府磁州知州陞吏部員外郎刑部郎中任陝西寧夏道
隨征噶爾丹有功補授江西九江道子之著陝西延安府安塞知縣
縣候補河南汝寧府羅山縣知縣成樑子二長之謨江南鳳陽府蒙
城縣知縣後任河南南陽府葉縣知縣調海豐縣知縣次之蓋順天
府儒學生員有集唐宮詞一冊行世朝楣廕正千戶子世泰官指揮
僉事朝瞻子二長世香邑庠生次世傑歲進士官山東教諭世傑子
永麟文庠生朝重子世魁未仕子二長永清官指揮使次永元江西
總督標下左營副總永清子天擎官副將鎮守江南溧陽勾容高淳
三縣陞廣西桂林府永寧州副總兵子騰霄文庠生清世祖恩賞癸
卯科舉人以知縣選用朝忠子世蕃未仕子二長永蔭官都司次永

鎮官副將永鎮子天植授山東登州營副總子成桂由刑部筆帖式任四川保寧府通判今傳十餘世子孫繁衍皆務農商

李氏 其先世居山東壽光後遷德平傳至四代祖熙字子明於清乾隆七年始出關抵寧遠遂家焉又二傳至永清字際泰子四長馥字潤庭六品職銜次霈字豐年三榮字向春四馨字香侯均誥封奉政大夫霈子國樑字雉山從九品職銜誥封奉政大夫子四長如藻字文言貢生捐納縣丞清同治八年投效陝西將軍庫克吉泰營中奏保賞戴藍翎試用知縣籤分直隸次如芝字瑞庭附生光緒元年孝廉方正歷任河南寧陵永寧等縣知縣另有傳見耆舊三如藩字猷庭武庠生四如霖字文溪太學生宣統元年孝廉方正子奎閣歷充

興

城 縣

志

卷九人物

六十三

興城華昌印刷局印

本縣各校教員受有教育廳一等褒狀如藻子麟閣字小言歷任河南商邱伊陽等縣知縣另有傳見耆舊如芝子葆臣字釋瑞歷充河南陝縣承審員信陽縣推事榮子四長國風字光明號仙洲任直隸順德府府經歷保陞知縣任沙河唐山邢台萬全等縣知縣另有傳見耆舊次國棟業儒三國重四國柏均未仕國棟子二長毓楨字子才歷任直隸滿城贊皇隆平等縣知縣另有傳見耆舊次維楨字文孚貢生子樹聲附貢歷充直隸陸軍二十三師書記官餘見選舉馨子國柱字砥齋武庠生子賡唐字月秋另有傳見隱逸子二長慶麟次蔭麟皆讀書未成名至今傳十世書香不絕

潘氏 其先世爲浙江山陰縣籍世爲刑幕由清順治末年避難至甯

遠甯遂家焉傳若干世（因無譜牒不可考）至名玉堂者嘉慶戊寅
舉人任直隸柏鄉縣知縣子二人長履謙歲貢生任直隸香河縣訓
導次履泰歲貢生候選訓導履謙子一人承曾附生承曾子二人長
崇麟附生曾充州署統計處調查員次崇琦附生曾充本州巡警局
總董履泰子三人長希曾附生次憲曾由河南候補府經歷保陞知
縣旋升知州指分山西候補賞戴花翎三嗣曾附生子翌坤補山西
托克城巡檢署五原廳同知玉堂之堂弟玉書歲貢生子二人長履
恒道光丁酉拔貢歷任直隸文安武清邢台等縣知縣官至平泉州
知州次履豐道光癸卯優貢任湖南新化縣知縣無子履恒子二人
長拱辰歲貢生任直隸河防北六工州判次丙辰附生任雲南霑益
州吏目後失蹤至今傳五世

興

城

縣

志

卷九人物

六十四

興城華昌印刷局印